

O D L U K A

*o izgradnji, upravljanju, korištenju, zaštiti i održavanju
mjesnih vodovoda na području općine Kakanj*

OBRADIVAČ: *Komisija za izradu Odluke o izgradnji, korištenju, zaštiti i održavanju
mjesnih vodovoda na području općine Kakanj*

PREDLAGAČ: *Općinski načelnik*

RAZMATRA : *Općinsko vijeće*
I USVAJA:

Broj: 0-01/1-...../17

Kakanj: godine

Na osnovu člana 8. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09), člana 24. i 38. Statuta Općine Kakanj („Službene novine Općine Kakanj“, broj: 4/08), te člana 12. i 14. Zakona o vodama Zeničko-dobojskog kantona („Službene novine Zeničko-dobojskog kantona“, broj: 17/07), Općinsko vijeće Kakanj na ____ sjednici, održanoj dana _____ 2017. godine.,
d o n o s i:

ODLUKU

***o izgradnji, upravljanju, korištenju, zaštiti i održavanju
mjesnih vodovoda na području općine Kakanj***

I – OPĆE ODREDBE

Član 1.

Ovom Odlukom utvrđuje se način izgradnje mjesnih vodovoda, bunara i javnih česmi, njihovo upravljanje i korištenje, zaštita i održavanje na području općine Kakanj.

Član 2.

Vodni objekti koji služe za snabdijevanje vodom za piće naselja izvan općinskih sjedišta su mjesni vodovodi, javne česme i bunari.

Svakom je dozvoljeno koristiti vodu običnim načinom koji ne zahtjeva posebne naprave i ne isključuje druge od jednakog korištenja vode (opća upotreba vode).

Opća upotreba vode obuhvata naročito:

- zahvatanje vode bez posebnih naprava iz vodotoka i jezera za osnovne potrebe jednog domaćinstva,
- zahvatanje podzemne vode (bunar na vlastitom zemljištu) ili vode s izvora na vlastitom zemljištu, koja se koriste za osnovne potrebe jednog domaćinstva,
- prikupljanje i korištenje oborinskih voda za osnovne potrebe jednog domaćinstva, koje se skupljaju na vlastitom zemljištu,
- rekreaciju na vodama.

Osnovnim potrebama domaćinstva smatra se korištenje vode za piće, održavanje čistoće i slične potrebe u domaćinstvu. Takvim korištenjem ne smatra se korištenjem vode za navodnjavanje, te korištenjem vode u tehnološkom procesu pri obavljanju privredne djelatnosti.

Za svako korištenje vode koje prelazi obim opće upotrebe potrebna je vodna dozvola u skladu sa Zakonom o vodama Zeničko-dobojskog kantona („Službene novine Zeničko-dobojskog kantona“, broj: 17/07).

Član 3.

Izvorišta voda koja se zahvataju radi snabdijevanja vodom za piće stanovništva putem mjesnih vodovoda moraju imati dovoljne količine zdravstveno ispravne vode za piće, kako bi se u svako doba godine moglo obezbijediti neprekidno snabdijevanje vodom stanovništva.

Izuzetno nadležni organ će investitoru izdati potrebne vodne saglasnosti i kad izvorišta nemaju dovoljne količine vode, ukoliko on na drugi način ne može riješiti snabdijevanje vodom.

Kaptaža i rezervoari, koji su u smislu ovog zakona sastavni dio mjesnog vodovoda a koji služe za prihvatanje i akumuliranje vode za piće, moraju imati propisne izolacije i ostale potrebne uređaje.

Kapacitet rezervoara mjesnog vodovoda treba da obezbijedi dovoljnu količinu vode za dnevnu potrošnju korisnika i rezervu za gašenje požara.

Mjesni vodovod mora imati ugrađen i propisno baždaren uređaj za mjerenje količine iskorištene vode na odvodu iz rezervoara a ako ima više odvoda iz rezervoara na svakom odvodu.

Korisnici lokalnih vodovoda moraju imati ugrađene i propisno baždarene mjerne uređaje (vodomjere) za nekretnine priključene na lokalni vodni objekat.

II – IZGRADNJA MJESNIH VODOVODA I JAVNIH ČESMI

Član 4.

Investitor za izgradnju mjesnog vodovoda može biti mjesna zajednica, grupa građana ili građanin.

Izgradnja mjesnog vodovoda vrši se na osnovu izdate urbanističke saglasnosti odnosno odobrenja za građenje po propisima o prostornom uređenju i građenju, uz prethodno pribavljanje prethodne vodne saglasnosti i vodne saglasnosti te po ostalim propisima iz Zakona o vodama Zeničko-dobojskog kantona („Službene novine Zeničko-dobojskog kantona“, broj: 17/07, u daljem tekstu: Zakon o vodama ZDK).

Investitor izgradnje javne česme može biti mjesna zajednica, grupa građana ili građanin.

Odluku o izgradnji javne česme donosi mjesna zajednica .

Ako je investitor grupa građana ili građanin izgradnja javne česme se vrši uz saglasnost mjesne zajednice.

Član 5.

Izgradnja i rekonstrukcija mjesnog vodovoda vrši se na način i pod uslovima određenim u izdatoj vodnoj saglasnosti.

Član 6.

Ukoliko je investitor grupa građana, dužni su putem organa mjesne zajednice izabrati Građevinski odbor od najmanje tri člana.

Dužnosti i prava Građevinskog odbora su:

- pribavljanje svih, zakonima propisanih akata potrebnih za izgradnju,
- otvaranje transakcijskog računa mjesne zajednice za ovu namjenu,
- organizovanje i potpisivanje „Ugovora o zajedničkoj izgradnji, korištenju i upravljanju vodoopskrbnim objektom“, koji u ime domaćinstva – korisnika potpisuje nosilac domaćinstva,
- potpisivanje ugovora sa izvođačima radova,
- vođenje evidencije o: učešću u izgradnji svakog pojedinca, prikupljenim ili utrošenim novčanim sredstvima i drugim podacima bitnim za izgradnju i kasnije korištenje objekata,
- da nakon završetka radova podnese pismeni izvještaj Savjetu mjesne zajednice .

III – UPRAVLJANJE, KORIŠTENJE I ODRŽAVANJE, MJESNIH VODOVODA I JAVNIH ČESMI

Član 7.

Nakon završetka izgradnje vodovoda ukoliko do donošenja ove Odluke ne postoji Građevinski odbor i nije organizovano potpisivanje „Ugovora o zajedničkoj izgradnji, korištenju i upravljanju vodoopskrbnim objektom“, predsjednik Savjeta mjesne zajednice saziva zbor korisnika vodovoda te isti biraju predsjednika, članove i blagajnika vodnog odbora - odbora za vodovod što predsjednik evidentira, sačinjavanjem zapisnika te isti dostavlja nadležnoj službi uz zahtjev za izdavanje vodne dozvole. Zapisnik mora sadržavati, broj protokola, spisak i potpise prisutnih predstavnika korisnika.

Svi građevinski odbori nakon izradnje mjesnog vodovoda prelaze u vodne odbore - odbore za vodovod, u koliko to nije urađeno do donošenja ove Odluke.

U slučaju da do donošenja ove Odluke ne postoji Vodni odbor - odbor za vodovod, predsjednik Savjeta mjesne zajednice je dužan da u roku od 6 mjeseci isti uspostavi.

Ukoliko korisnik vodovoda ne želi potpisati „Ugovor o zajedničkoj izgradnji, korištenju i upravljanju vodoopskrbnim objektom“, smatra se da je odustao od prava na vodovod, te se takvom voda može isključiti.

Dužnosti i prava Vodnog odbora - odbora za vodovod su:

- Preuzima prava i obaveze od građevinskog odbora,
- Pribavlja sve dozvole i saglasnosti propisane zakonima koje uređuju tu oblast,
- Rješava imovinsko-pravna pitanja vezana za mjesni vodovod,
- vođenje evidencije o: prikupljenim ili utrošenim novčanim sredstvima i drugim podacima bitnim za rekonstrukciju i sanaciju vodovoda i korištenje objekata,

- Saziva zbor korisnika uz prisustvo predsjednika Savjeta mjesne zajednice ili zamjenika vezano za sva bitna pitanja finansiranja, održavanja, sanacije i rekonstrukcije vodovoda,
- Dva puta godišnje podnosi pismeni izvještaj Savjetu mjesne zajednice i nadležnoj općinskoj službi,
- Da provodi obaveze iz „Ugovora o zajedničkoj izgradnji, korištenju i upravljanju vodoopskrbnim objektom“.

Po izvršenoj izgradnji ili rekonstrukciji mjesnog vodovoda, a prije izdavanja odobrenja za upotrebu po propisima o prostornom uređenju i građenju pribavlja se vodna dozvola.

Uz zahtjev za izdavanje vodne dozvole za mjesni vodovod za koji su investitori grupa građana, podnosi se i pismeni ugovor o održavanju i iskorištavanju mjesnog vodovoda i regulisanju svih pitanja od značaja za mjesni vodovod, koji potpisuju svi investitori-korisnici tog objekta, a koji se ovjerava na sudu, općini ili kod notara i čiji se primjerak dostavlja nadležnoj općinskoj službi.

Upravljanje javnim česnama je u nadležnosti mjesne zajednice, osim u slučaju izgradnje javne česme od strane pojedinca ili grupe građana.

Prenošenje nadležnosti upravljanjem javnom česmom na mjesnu zajednicu se može izvršiti uz saglasnost mjesne zajednice i investitora.

Član 8.

Licima koja nisu učestvovala u izgradnji mjesnog vodovoda, može se odobriti priključak na mjesni vodovod na osnovu vodne saglasnosti koju izdaje Vodni odbor - odbora za vodovod ili u slučaju spora izdaje općinska služba nadležna za izdavanje vodnih akata.

Vodna saglasnost se izdaje uz pribavljeno mišljenje:

- Mjesne zajednice o mogućnostima najekonomičnijeg rješavanja vodosnabdijevanja podnosioca zahtjeva,
- Mišljenja komunalnog preduzeća o mogućnosti priključka na postojeći profil cijevi.

Vodnom saglasnošću odobrit će se priključak na mjesni vodovod s obzirom na količinu vode za piće, ako može da zadovolji i potrebe interesanata i ako se njihovo snabdijevanje vodom za piće ne može izvršiti na drugi (ekonomičan i racionalan) način.

Lice kome je vodnom saglasnošću odobreno priključenje na mjesni vodovod dužno je prije priključenja, odnosno korištenja vode, putem ugovora sa vlasnicima mjesnog vodovoda, regulisati plaćanje srazmjernog dijela troškova izgradnje mjesnog vodovoda i srazmjernog dijela troškova održavanja i iskorištavanja mjesnog vodovoda.

Lice kojem je vodnom saglasnošću odobreno priključenje na mjesni vodovod, treba da plati srazmjerni dio troškova u smislu stava 4. ovog člana i ne može biti većeg iznosa od učešća svakog pojedinog investitora u izgradnji ili rekonstrukciji mjesnog vodovoda, kao i u troškovima održavanja i iskorištavanja tog objekta.

Ako lice kojem je vodnom saglasnošću odobreno priključenje na mjesni vodovod ne zaključi ugovor sa vlasnicima mjesnog vodovoda, o troškovima priključenja na mjesni vodovod, odnosno korištenja vode, i nastali međusobni spor rješava nadležni sud.

Ako se rekonstrukcija vodovoda vrši u cilju povećanja količine vode troškove rekonstrukcije snose svi korisnici vodovoda a novi korisnici snose dio troškova izgradnje i rekonstrukcije vodovoda.

Ukoliko se za rekonstrukciju ili izgradnju vodovoda obezbjede sredstava iz Općine, Kantona, Federacije i drugih institucija ili je već izgrađen i finansiran od strane istih, u tim slučajevima upravljanjem i održavanjem vodovoda nadležan je Vodni odbor - Odbor za vodovod.

Ukoliko je dovoljan kapacitet izvorišta a profil cijevi ne dozvoljava mogućnost novih priključaka, tada se finansiranje izmjena postojećeg profila vrši po Odluci zbora korisnika iz prikupljenih sredstava održavanja.

Član 9.

Korisnici vodovoda koji upravljaju mjesnim vodovodom odnosno vodni odbor - odbor za vodovod dužni su da trajno obezbjeđuju potrebna finansijska sredstva i druge uslove za održavanje i funkcionisanje tih objekata u skladu sa njihovom prirodom i namjenom.

Član 10.

Sredstva prikupljena za potrošnju i održavanje vodovoda su namjenska i mogu se trošiti isključivo odlukom Savjeta mjesne zajednice .

Član 11.

Cijena korištenja vode, održavanje objekta i druge troškove neophodne za rad i funkcionisanje objekta u skladu sa prirodom njegove namjene, kao i način prikupljanja sredstava po prijedlogu korisnika, utvrđuje svojom odlukom Savjet mjesne zajednice za svaki objekat pojedinačno a odobrava nadležna općinska služba.

Cijena vode mora osigurati pokrivanje nužnih troškova održavanja i troškove amortizacije. Po zahtjevu korisnika troškove amortizacije utvrđuje komunalno preduzeće uz naknadu.

Član 12.

Naplatu sredstava za korištenje i održavanje mjesnog vodovoda vrši ovlašteno lice (blagajnik) uz izdavanje priznanice ovjerene pečatom mjesne zajednice.

Prikupljena sredstva se uplaćuju na podračun mjesne zajednice do 15-og tekućeg mjeseca, jednom ili više puta mjesečno u skladu sa prilivom sredstava.

Izvještaj o prikupljenim sredstvima sa izvodom iz banke i izvještaj uz dokaz o utrošenim sredstvima, ovlašteno lice podnosi kvartalno korisnicima a mjesnoj zajednici dva puta u toku godine (do 30.06 i 31.12.) i Općinskom vijeću jednom godišnje.

Član 13.

Ukoliko korisnik ne izvršava obaveze plaćanja i održavanja mjesnog vodovoda, na osnovu podnesenog Izvještaja o izvršenim uplatama Savjet mjesne zajednice podnosi zahtjev za pokretanje prekršajnog postupka kod nadležnog organa.

Član 14.

Svi mjesni vodovodi mogu se uz saglasnost njihovih korisnika predati na upravljanje komunalnom preduzeću.

Cijena vode isporučene iz mjesnog vodovoda ne može biti određena ispod cijene koja osigurava pokrivanje nužnih troškova za održavanje i funkcionisanje objekata mjesnog vodovoda i troškova amortizacije.

Cijenu vode vodovoda koji su predati na upravljanje komunalnom preduzeću predlaže komunalno preduzeće a usvaja Općinsko vijeće Kakanj.

Član 15.

Vodovodi koji su izgrađeni iz sredstava Općine, Kantona, Federacije i drugih institucija koji snabdijevaju preko 500 stanovnika uključivo i dokazive izdatke za naknadna proširenja i rekonstrukcije u dijelu više od 1/2 uloženi sredstava, predaju se na upravljanje komunalnom preduzeću uz suglasnost komunalnog preduzeća i upravitelja vodovoda (vodnog odbora - odbora za vodovod).

Uložena vlastita sredstva korisnika, komunalno preduzeće će kompenzirati isporukom vode bez naplate za period koji će pokrivati troškove vlastitih ulaganja građana.

Prioritete u korištenju sredstava za rekonstrukciju i izgradnju vodovoda iz svih izvora finansiranja imaju korisnici koji:

- vrše redovne uplate održavanja vodovoda i o istom dostavljaju Izvještaj nadležnoj službi,
- saglasni su da rekonstruisani ili novoizgrađeni vodovod daju na upravljanje komunalnom preduzeću,
- imaju dugogodišnji problem u vodosnabdijevanju.

Navedene uslove utvrđuje nadležna općinska Komisija koju imenuje Općinski načelnik.

Član 16.

Voda se mora koristiti racionalno i ekonomično. Svaki korisnik vode je dužan koristiti vodu na način i u obimu kojim se voda čuva od rasipanja i štetnih promjena njenih osobina i omogućuje zakonsko pravo korištenja vode drugim licima.

U periodu hidrološkog minimuma (sušni period) za mjesne vodovode koji nemaju dovoljnu količinu vode upravitelj - Vodni odbor donesi Odluku o uvođenju redukcije vode .

Član 17.

U periodu hidrološkog minimuma (sušni period) koji može nastati u različitim periodima godine u naseljima sa smanjenom količinom vode, zabranjena je upotreba vode iz mjesnog vodovoda i javne česme za sve druge potrebe osim za piće i sanitarne potrebe.

Maksimalna dnevna potrošnja vode u tom periodu po članu domaćinstva je 100 litara .

U periodu ekstremne suše dnevna potrošnja vode po članu može biti i manja što utvrđuje svojom odlukom zbor korisnika vodovoda.

Protiv korisnika koji se ne pridržavaju Odluke o redukciji vode, na prijedlog zbora korisnika, mjesna zajednica vodnom inspektoratu podnosi prijedlog za pokretanje prekršajnog postupka.

IV - ZAŠTITA VODE LOKALNOG VODOVODA I JAVNIH ČESMI

Član 18.

Zaštita izvorišta mjesnih vodovoda vrši se uspostavljanjem i održavanjem zona sanitarne zaštite u skladu sa odredbama Zakona o vodama („Službene novine Zeničko-dobojskog kantona“, broj: 17/07) kao i Pravilnikom kojim je detaljnije regulisana i uređena ova oblast.

Član 19.

Do donošenja Odluke za zaštitu izvorišta po odredbama Pravilnika o načinu utvrđivanja uslova za određivanje zona sanitarne zaštite i zaštitnih mjera za izvorišta za javno vodosnabdijevanje („Službene novine Federacije BiH“, broj: 88/12, u daljem tekstu: Pravilnik) uspostavlja se privremena zaštita svih izvorišta u radijusu od 50 metara od postojećeg vodozahvata.

U radijusu od 50 metara zabranjene su sve aktivnosti propisane Pravilnikom koji uređuje ovu oblast a odnose se na prvu zaštitnu zonu prema Pravilniku.

Objekti koji pored vodozahvata imaju izgrađene i rezervoare potrebno je zaštititi postavljanjem propisne ograde u prečniku od 10 metara, minimalne visine 2 metra.

Prečnik postavljanja ograde se može u izuzetnim slučajevima i smanjiti uz saglasnost nadležne općinske službe.

Finansiranje uspostave privremene zaštitne zone preuzimaju korisnici vodovoda tj. upravitelj(vodni odbor - odbor za vodovod).

Član 20.

Zabranjeno je neovlaštenim licima otvaranje i zatvaranje armatura, instalacija i hidranata i ostalih uređaja mjesnih vodovoda, izuzev u slučajevima kada je to nužno u cilju sprečavanja šteta većih razmjera.

Član 21.

Korisnici mjesnih vodovoda su dužni u slučaju potrebe u zavisnosti od kvaliteta vode u objekte rezervoara ugraditi hlorinatore a hlorinacija i održavanje hlorinatora se vrši pod nadzorom preduzeća registrovanog za obavljanje komunalne djelatnosti što korisnici dokazuju Ugovorom o povremenim radovima.

Član 22.

Pregled zdravstvene ispravnosti vode za piće korisnici su dužni vršiti dva puta godišnje a pregled vrši pravno lice sa kojim korisnici sačine Ugovor o monitoringu kvaliteta vode.

O istom korisnici moraju obavijestiti nadležnu općinsku službu dva puta godišnje.

V- NADZOR

Član 23.

Inspeksijski nadzor nad provođenjem ove Odluke, u skladu sa članom 129. Zakona o vodama ZDK vrši vodna inspekcija.

VI – KAZNENE ODREDBE

Član 24.

Novčanom kaznom u iznosu od 100,00 KM do 500,00 KM bit će kažnjen za prekršaj fizičko lice , korisnik ako:

- 1) ako ne provodi Odluku o zaštiti izvorišta,
- 2) ako ne izvršava i ne podnosi izvještaj o utrošku sredstava,
- 3) ako korisnik vodovoda odbije doći na blagovremeno obavješteni zbor korisnika bez valjanog opravdanja,
- 4) ako licu kojem je vodnom dozvolom odobren priključak na mjesni vodovod i korištenje vode sa tog vodovoda ometa priključenje na mjesni vodovod ili mu ometa snabdijevanje vodom iz mjesnog vodovoda (član 8. ove Odluke),
- 5) ako ne obezbjeđuje finansijska sredstva i druge uslove za održavanje i funkcioniranje mjesnog vodovoda u skladu sa njegovom prirodom i namjenom (član 9. ove Odluke),
- 6) ako se ne pridržavaju Odluke o redukciji vode,
- 7) ako neovlašteno pristupi u područje privremene zaštitne zone mjesnog vodovoda, ili u prvu zaštitnu zonu mjesnog vodovoda,
- 8) ako se priključi na mjesni vodovod bez vodne saglasnosti Vodnog odbora - Odbora za vodovod ili nadležnog općinskog organa,
- 9) ako ne ugradi vodomjer,
- 10) ako vrši zabranjene aktivnosti u zaštitnoj zoni mjesnog vodovoda,
- 11) ako vrši prekomjernu potrošnju vode u vrijeme hidrološkog minimuma,
- 12) ako ošteti instalacije i objekat javne česme,
- 13) ako ne održava javnu česmu,
- 14) ako ne postupi po rješenju inspektora.

Član 25.

Novčanom kaznom u iznosu od 500,00 KM do 10.000,00 KM bit će kažnjeni za prekršaj predsjednik i članovi savjeta MZ, predsjednik i članovi Vodnog odbora-Odbora za vodovod, predsjednik i članovi Građevinskog odbora ako:

- 1) ako ne izvrši obaveze iz člana 7. ove Odluke,
- 2) ako ne postupi shodno članu 3. stav 4. i 3. ove Odluke,
- 3) ako Vodni odbor – odbor za vodovod ne uspostavi privremenu zaštitnu zonu u roku od 4 mjeseca od uspostave vodnog odbora - odbora za vodovodu ili od dana donošenja ove Odluke,
- 4) ako ne podnese zahtjev za izdavanje vodne dozvole,
- 5) ako mjesni vodovod ne održava u funkcionalnom stanju i ne koristi ga u skladu sa njegovom prirodom i namjenom,
- 6) ako ne održava javnu česmu,
- 7) ako ne zaključi Ugovor o zdravstvenom pregledu vode i Ugovor o hlorinaciji vode u slučaju potrebe i polugodišnje i godišnje izvještaje ne dostavlja općinskoj službi,
- 8) ako ne obezbjeđuje finansijska sredstva i druge uslove za održavanje i funkcioniranje mjesnog vodovoda u skladu sa njegovom prirodom i namjenom (član 9. ove Odluke),
- 9) ako ne postupi po rješenju inspektora

VII – PRELAZNE I ZAVRŠNE ODREDBE

Član 26.

Danom stupanja na snagu ove Odluke prestaje primjena Odluke o izgradnji, upravljanju, korištenju, zaštiti i održavanju vodoprivrednih objekata u selima („Službene novine Općine Kakanj“, broj: 01/01).

Član 27.

Ova Odluka stupa na snagu osmog dana od dana objavljivanja u „Službenim novinama Općine Kakanj“.

***PREDSJEDAVAJUĆI
OPĆINSKOG VIJEĆA***

Katičić Slaven, s.r.

Obrazloženje

Na osnovu člana 8. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09) predviđeno je da jedinica lokalne samouprave ima vlastite nadležnosti ustanovljene ustavom i zakonom i ima pravo baviti se svim pitanjima od lokalnog značaja koja nisu isključena iz njene nadležnosti, niti dodijeljena u nadležnost neke druge vlasti na osnovu ustava i zakona, shodno članovima 24. i 38. Statuta Općine Kakanj („Službene novine Općine Kakanj“, broj: 4/08) navodi se da Općinski načelnik kao nosilac izvršnih poslova u okviru samoupravnog djelokruga Općine u okviru svoje nadležnosti predlaže odluke i druge akte Općinskom vijeću a Općinsko vijeće u okviru svoje nadležnosti donosi odluke i druge opće akte kojima se uređuju pitanja iz samoupravnog djelokruga Općine.

Navedena oblast je tretirana i na osnovu članova 12. i 14. Zakona o vodama Zeničko-dobojskog kantona („Službene novine Zeničko-dobojskog kantona“, broj: 17/07, u daljem tekstu: Zakon o vodama ZDK) i shodno tome je predloženo donošenje ove Odluke, te su se pokušale riješiti nedoumice vezane za legalizaciju, upravljanje, korištenje, i zaštitu mjesnih vodovoda na području općine Kakanj. Cilj izrade odluke je uspostava upravnog tijela vodovoda (vodnog odbora), olakšanje komunikacije između vodnog odbora i korisnika, uspostava obaveza zaštite izvorišta i provođenja zaštitnih mjera te samim tim i poboljšanje zdravstvene ispravnosti vode.

Zbog velikih problema u praksi oko implementacije Zakona o vodama ZDK i odredbi Pravilnika o načinu određivanja uvjeta za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine Federacije BiH“, broj: 88/12, u daljem tekstu: Pravilnik) te određenih propusta u pogledu donošenja i izvršenja zakonskih odredbi kao i propusta zakonskih rokova iz proteklog perioda zbog raznih okolnosti, donošenjem ovakve Odluke, kroz razradu i bliže tumačenje zakonskih odredbi i normativa koji regulišu ovu oblast i implementacijom na terenu, regulisanje ove oblasti dobilo bi svoj puni smisao. Ovo se naročito odnosi na odredbe Zakona o vodama ZDK, odnosno članove 148., 134. stav 2, 116. stav 2, 114. stav 3, te odredbe Pravilnika, odnosno članove 14. i 15., gdje je zbog činjenice stanja na terenu i djelimične provedbe legalizacije mjesnih vodovoda, finansijske situacije stanovništva i dr. došlo do potrebe za izradom Odluke o izgradnji, upravljanju, korištenju, zaštiti i održavanju mjesnih vodovoda na području općine Kakanj, kojom bi se bliže pokrila problematika iz ove oblasti.